

Hasta riba dia cu Prins Bernhard a fayece:

Bebemento formal den Arubahuis

ORANJESTAD (AAN): -- Bagamunderia grandi ta sigui tuma lugar den Arubahuis na Hulanda unda placa di pueblo di Aruba ta wordo malgasta na grandi y sin limite pasobra gran parti di e personal ta existi di sea ruman of familiar directo di ministronan y no tin un solo alma cu por para nan.

Informacionnan haya for di Hulanda lo laga pueblo haya ril di spanto den curpa ora pueblo haya di tende con bebemento formal ta tuma lugar den Arubahuis.

No ta trata di algun ocasion unda cu algun hende lo a bebe djis un tiki di mas pasobra ta trata di bebemento structural cu ta tuma lugar cada biaha cu tin cualkier oportunidad of excusa fofa pa tene fiesta na Arubahuis.

Riba e dia cu pueblo Hulandes den su totalidad tabata den luto pa cu fayecimento di su alteza real prins Bernhard, na Arubahuis unda bandera tabata colga halfstok, tabata tin bebemento sin fin.

Riba e dia ey cual mester tabata un dia di luto pa Arubahuis, mescos cu na Aruba unda gobernador a cancela tur actividad cu e tabata riba agenda pa tene luto pa cu fayecimento di un miembro di Casa Real, esnan na Arubahuis a tene un bebemento formal relaciona cu bishita di un ministro di Aruba.

Despues cu mayoria di esnan cu tabata presente a yena nan curpa unda cu casi

no tabata por mas cu alcohol y dia tabata yegando su fin pa loke ta trata horario di oficina, e grupito bon bebi a dicidi di sali di Arubahuis pa sigui bebe den un lugar den cercania cu lo ta yama Bell Air y aparentemente un hefe grandi mester a wordo carga hiba pa su cas pasobra e no por a cana mas di tanto alcohol den curpa.

Hulandesnan cu a mira kico tabata pasando den e lugar publico menciona, tabata cuestiona e actitud di esnan di Arubahuis cu a mustra publicamente di no tin respet pa luto nacional di pueblo Hulandes.

Esey no ta e unico caso di bebemento sin misericordia; riba dia di aña di La Reina esnan den Arubahuis a tene un asina yama Oranje borrel unda familiar di un ministro lo a bebe un botter di whisky cu e lo a saca di lachi di un ruman di un otro ministro y e compay aki a keda waya waya y no por a cana mas y

nan mester a hibe su cas y el a haya atrobe algun dia pa e Koel Af! Esta bunita; bo ta bebe pata pata den Arubahuis y despues bo por keda cas pa algun dia pa saca wayaba y cu pago.

Manera cu esaki no tabata suficiente, un bustour tambe tabata den wega unda esnan di Arubahuis lo a bay trip den bus y ey ta caminda unda otro ruman di ministro tambe no por a keda atras y e lo a bebe bira pata pata burachi.

Na Arubahuis mes tin hende ta pasa bende cerbes cu ta wordo traha na Aruba y esnan den Arubahuis ta cumpra na grandi y ta bebe esaki den un solo biaha y asina e fiesta cu bebemento den Arubahuis a bira algo structural y unda ora hende bay pa wordo atendi nan ta topa cu funcionarionan di Arubahuis cu ta holer stinki di alcohol, segun reaccionnan haya for di Hulanda.

Ora algun hende di posicion halto trata na reclama esnan

cu ta abusa di nan puesto na Arubahuis, nan ta haya di tende cu lo ta mihor pa nan keda keto pasobra nan tambe tin cos pa tapa manera amante den banda na

Hulanda y yiu na Aruba cu lo a keda riba payroll di gobierno for di dia cu MEP a drenta gobernacion y asina tin tapamento di un banda pa otro.

Unda miyones di Arafat a keda cu a worde manda Aruba?


ORANJESTAD (AAN): -- No mucho luna pasa number di Aruba a wordo menciona den noticia internacional relaciona cu miyones di dolar di Arafat cu lo a wordo manda pa diferente pais rond mundo.

Ora Arafat a muri hopi hende tabata busca moda pa haya sa unda miyones cu Arafat a haya for di diferente fuente pa e pueblo di Palestinonan, a keda y asina tambe investigacionnan a wordo haci unda a bin sali afor cu Arafat, aparentemente pa motibonan di entre otro seguridad, a laga deposita sumanan miyonario na diferente pais.

Un di e paisnan unda sumanan miyonario lo a wordo manda tabata Aruba, segun informenan via agencianan di noticia internacional.

Te hasta number di un compania Offshore na Aruba a wordo menciona, pero te awe no tabata tin claridad riba e asunto aki y ta parce cu tur cos lo a bay den e famoso doofpot, segun reaccion haya for di hendenan cu a sigui e caso aki di cerca y cu keto bay ta haya cu atrobe number di Aruba ta wordo menciona rond mundo como pais unda miyones por desaparece y nada ta wordo haci pa investiga un ke otro.

CABRITO BUFFET!!



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



**Foot
Massager**
Afl. 55,=